



**TEKS UCAPAN
PERHIMPUNAN DBKU BERSAMA
YANG BERBAHAGIA DATUK BANDAR KUCHING UTARA
SEMPENA PERHIMPUNAN DBKU EDISI JULAI 2015
1 JULAI 2015
AUDITORIUM DBKU**

Bismillahirrahmanirrahim....

Terima kasih kepada saudara Pengerusi Majlis

Yang Berusaha Encik Jumaini Haili

Pemangku Pengarah Dewan Bandaraya Kuching Utara

Pegawai-Pegawai Kanan DBKU

Rakan Media

Serta seluruh warga kerja DBKU yang saya kasihi sekalian....

Assalamualaikum Warahmatullahi Wabarakatuh.....

Salam sejahtera, Salam Satu Malaysia dan Salam 1 DBKU....

Alhamdulillah, pertama sekali, saya ingin memanjatkan rasa syukur yang tidak terhingga kepada Allah SWT kerana kita dapat berkumpul pada pagi ini dalam bulan Ramadhan untuk perhimpunan bulanan DBKU, Edisi bulan Julai 2015.

Tuan-tuan dan puan-puan yang saya hormati sekalian,

Sebagai pembuka bicara, pada kesempatan ini belum terlambat sekiranya saya ingin mengucapkan selamat menyambut bulan Ramadhan Al-Mubarak dan selamat menunaikan ibadah puasa kepada seluruh warga kerja DBKU yang beragama Islam.

Justeru itu, adalah amat baik sekiranya kita semua mengambil kesempatan ini untuk bersama-sama melipat gandakan amalan kita semua. Gunakanlah peluang yang masih lagi Allah SWT berikan ini dengan sebaik-baiknya agar kita dipelihara daripada melakukan kemungkaran di bulan yang mulia ini.

Tuan-tuan dan puan-puan sekalian,

Seperti yang kita semua sedia maklum, pada 1 Ogos 2015 (Sabtu) nanti, seluruh warga Bandaraya Kuching akan menyambut Sambutan Hari Bandaraya Kuching yang ke-27. Majlis Perasmian bagi meraikan Sambutan Hari Bandaraya Kuching yang ke-27 ini akan diadakan bertempat di Stadium Perpaduan, Petra Jaya, Kuching.

Apa yang lebih istimewa Sambutan Hari Bandaraya Kuching kali ini adalah, pengisytiharan Bandaraya Kuching sebagai **Bandaraya Perpaduan** oleh YAB Ketua Menteri Sarawak akan dilakukan sebagai acara kemuncak. Pengisytiharan ini merupakan pengiktirafan yang julung kalinya diterima oleh sesebuah bandar raya dan Bandaraya Kuching telah mendapat penghormatan untuk diisytiharkan sebagai Bandaraya Perpaduan oleh Yayasan 1Malaysia (*1Malaysia Foundation*).

Pemilihan Bandaraya Kuching sebagai Bandaraya Perpaduan adalah berdasarkan kajian yang telah dijalankan oleh Yayasan 1Malaysia diseluruh bandar raya di dalam Malaysia dan Alhamdulillah, dengan rasa bangganya Bandaraya Kuching telah mengungguli dan memenuhi kriteria yang telah ditetapkan untuk menjadi sebuah Bandaraya Perpaduan.

Untuk pengetahuan warga kerja juga, faktor paling utama penyumbang kepada mengapa Bandaraya Kuching dipilih sebagai Bandaraya Perpaduan adalah, Bandaraya Kuching dihuni oleh warga kota yang terdiri daripada berbilang kaum, agama dan budaya. Di samping itu, Bandaraya Kuching juga didiami oleh kaum etnik yang paling banyak, hidup dalam keadaan aman, damai dan harmoni jika dibandingkan dengan bandar raya lain di seluruh Malaysia.

Tuan-tuan dan puan-puan,

Selain daripada mengadakan Sambutan Hari Bandaraya Kuching yang ke-27, Pesta Kuching 2015 juga bakal dianjurkan dengan pengisian pelbagai aktiviti selingan yang akan disajikan kepada seluruh warga kota seperti Pesta Laksa, *City Day Ride*, *I Love Kuching*, *Street Parade*, *Grand Finale* dan pelbagai lagi acara menarik yang sudah pastinya akan mengegarkan dan menggamatkan lagi Bandaraya Kuching nanti.

Semua acara yang kita bakal anjurkan ini adalah hadiah dan juga sebagai tanda ucapan penghargaan dan juga terima kasih kita kepada seluruh warga kota yang selama ini telah menyokong DBKU dalam mentadbir Bandaraya Kuching.

Sesungguhnya tanpa komitmen yang tinggi dan sokongan yang padu yang kita terima daripada warga kota, Dewan Bandaraya Kuching Utara dan juga Bandaraya Kuching tidak akan berada pada tahap sekarang ini.

Tuan-tuan dan puan-puan yang saya hormati sekalian,

Oleh yang demikian, bagi melancarkan lagi segala persiapan yang telah kita rancang dan rencanakan untuk sambutan Hari Bandaraya Kuching yang ke-27 dan juga Pesta Kuching 2015, saya amat berharap agar semua warga kerja dapat bekerjasama erat dan juga memberikan komitmen yang padu semasa melaksanakan persiapan untuk penganjuran kedua-dua acara tersebut nanti.

Lets starts the ball rolling now.... masa amat mencemburui kita dan kita tidak mempunyai tempoh masa yang lama untuk melakukan persediaan bagi menjayakan kedua-dua acara tersebut memandangkan kita juga amat sibuk untuk menyambut Hari Raya Aidilfiri.

Diharap, apa yang telah kita rancang dan rencanakan untuk sambutan Hari Bandaraya Kuching yang ke-27 dan juga Pesta Kuching 2015 akan berjalan dengan lancar dan akan berlangsung dengan lebih baik dari tahun-tahun yang sebelumnya.

Tuan-tuan dan Puan-puan,

Suka saya sarankan di sini agar warga kerja semua berbelanja dengan berhemah, elakkan daripada melakukan pembaziran. Berbelanjalah mengikut keperluan dan bukan mengikut kehendak dan nafsu. Ingatlah bahawa, membazir itu merupakan salah satu amalan yang ditegah dan sangat tidak digalakkan dalam Islam.

Pada bulan Ramadhan yang mulia dan penuh barokah ini, marilah kita bersama-sama penuhinya dengan melakukan ibadah dan juga amal jariah. Semoga setiap amalan kita sentiasa dirahmati dan diberkati olehNya.

Sekian....

Wabillahitaufiq Walhidayah Wassalamualaikum Warahmatullahi Wabarakatuh....